

Serbski sejm: Serby deje měš w załožbowej raže wětšynu

Serbski sejm jo wobradował w Wětošowje

Z Wětošowa/Vetschau. Serbski sejm póžeda, až wobsajženje rady Załožby za serbski lud dej se reformerowaš. Měra za to deje byś internacionalnje pšípóznate principy mjeńšynowego šćita (Minderheitenschutz). Sejm pomina, až rada załožby dej se rozšyriš wó styrjoch dalšnych zastupnikow serbskego ludu. Serbske zastupniki deje byś naslědku we wětšynje. To jo sejm wobzamknul na wobradowanju sobotu – jo nam powězeł wótpóslany Hanzo Wylem-Kell.

Wótpóslane sejma tejerownosći póžedaju, až we raže dej se kněžys princip paritetnosći (Parität) mjazy Dolnymi a Górnymi Serbami. To groni: połojca člankow dej byś górnoserbska a połojca dolnoserbiska. Pšeto wóni su měnjece, až wudanki za Dolnu Łužycu deje dostaš wěcej wažnosći, dokulaž rěčna situacija w Dolnej Łužycy jo ryjnjejša. Dolne Serby deje móc sami měš to grono, za co swóju želbu pjenjez wudaju – to służy emancipaciji, a za nju jo samse-póstajowanje (Selbstbestimmung) notne.

Wótpóslane su wobzamknuli jadnański pórěd (Geschäftsordnung). We njom jo wustawjone, až žedne frakcije njejsu pšiwđane. Wótmyslenje ga jo, až mandat kuždego wótpó-

slanego wósebje dej byś zmócnjony. Take wustawjenje dej słužys wěcownosći (Sachlichkeit) a zadoraš frakcijskim grakanjam.

Sejm jo wuzwólił prezidium, kótaryž bužo wobradowanja pšigótowaš, je nawjedowaš a dalšne žěło sejma organizěrowaš. Do njogo su wuzwólili Sandru Wilhelmowu, Jana Kósyka a Aleksandra Pólka.

Sejm jo załožyl fachowe wuběrki (Ausschüsse): wuběrk za kubłanje, kulturu a młóžinu; juristiski wuběrk; wuběrk za góšpodarstwo a regionalne wuwiše; wuběrk za informacisku techniku (IT); a wuběrk za zjawne žěło.

Na wobradowanju su znate cynili, až kósty wuzwólowanja Serbskego sejma su zapłašone. Šćodre dawarje su zložyli nagromadu 25.000 €, což dosega teke za to, aby Sejm chopił žělaš. Za wótpóslanego Měrcina Krawca z Budyšyna jo to znamje, až to póžedanje za demokratiskimi pšeměnjenjami jo we ludu mócne, a až to njejsu jano prozne słowa.

Na wobradowanju jo se wobžěliło 16 wótpóslanych: 10 z Dolneje a 6 z Górneje Łužyce. Šořta Wětošowa Bengt Kanzler jo wótpóslanych pówitał a póstrowne grono žaržał. Pšiduce wobradowanje Sejma bužo 9. februar w Wórjejach. **G. W.**